

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 17 (1921)

Rubrik: Cronica della Romania

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 06.05.2025

ETH-Bibliothek Zürich, E-Periodica, <https://www.e-periodica.ch>



Cronica della Romania.

1919.

Per la 23avla gada ha il stab della Romania convocau sia schuldada tier ina biala impurtonta revista a Domat, ils 13 de Settember 1919. Ord differentis motivs ei quella nunballuonta dustonza encunter nies inimitg secular, la germanisaziun vegnida tschernida sco liug de sesiun. Ins voleva engraziar alla nunsurventscheivla avanguardia per la fideivladat demussada al car lungatg mumma, sco era medemamein compartir danovamein curascha e fidonza, bandischar il nausch spért dell'indifferenza e dil materialismus.

Tier la redunonza de fatschentas, aviarta gia las otg della damaun ella „Cruna”, interrutta per l'assistenza al survetsch divin, e continuada allas 12 $\frac{1}{2}$, eran varga 20 activs ne premurai commembers passivs secattai. Il tractandum principal fuva la creaziun della Ligia romontscha. Il president rev. subdiacon Gion Capaul referescha sur la redunonza dils 27 de Fenadur a Tusaun, nua ch'igl ei vegniu fatg igl emprend pass per unir las differentas societats romontschas, e nua che la Romania fuva era rappresentada. Il project de statutas ei ella discussiun suondonta vegnius anflaus per memia centralists. Beneventond cordialmein l'allianza projectada desiderescha la redunonza, che quella prenda il character d'in sempel cartell e respecti tont

sco pusseivel l'autonomia, l'indipendenza ed igl agen tschespet de scadina dellas societats participontas. Instrucziuns conformas a quels giavischs vegnan dadas als delegai, che vegnan el num della Romania prender part dalla redunonza constitutiva provedida per quest atun a Cuera.

Ord las autras tractandas ei mo d'allegar, che sgr. scolast Baseli Giger, cassier demissionont, vegn remplazaus entras sgr. Battista Simonet, medemamein scolast a Mustér. Ina proposiziun de stud. teol. Fry de metter neu ina bandiera per la Romania anfla viva resistenza ed ad interim negina grazia. Sco commembers dil comite vegnan elegi: president: Gion Battista Berther, stud. rer. nat.; commembers: Raimund Vieli, stud. filol., Giusep Simonet, stud. teol., actuar, Rev. sgr. Canon Rest Caminada e scolast Giusep Willi.

Finida la redunonza interna semettan ils commembers accompignai d'in grond pievel e dalla musica instrumentala de Domat en moviment en til festiv encunter il Plong Mulin. Suent il plaid de beneventaziun dil president Gion Capaul, referescha Dr. Gieri Willi, ord siu reh scazi d'enconuschientscha e perscrutaziun locala, sur la historia ed il lungatg de Domat. La continuaziun ha giu liug en la sala della „Glashütte“, nua che plaids de bien humor ed oreifras produenziuns dil chor e della musica de Domat parevan de conquerer per la palma.

Tenor Giusep Simonet,
stud. teol., actuar.

1920.

Il pertratg della bandiera ei, nunditgond la resistenza anflada a Domat, buca vegnius a

ruaus. Zaconts students dil seminari de Sogn Lezi a Cuera han sin lur atgna iniziativa e responsabladat, cun consentiment de biars auters commembers activs e honoraris, promoviu la caussa, schau elaborar in project entras Pader Notker Curti a Mustér e dau el en executiun alla claustra de muniessas della Maigrauge a Friburg. Colurs fundamentalas ein quellas della Cadi: verd e tgietschen, separadas entras la crusch alva federala. Ils dus medaglions portan ils maletgs de S. Gieri cul drag e digl ischi de Trun.

Ina pli favoreivla caschun de benedir la bandiera, che l'emprema dieta catolica sursilvana ils 8 de Settember a Trun, havess ei buca saviu dar. Suenter il survetsch divin sin Accladira, davos la baselgia de Nossa Junna della Glisch, en preschientscha de pli che 5000 persunas, ei la benedicziun solemna vegnida exequida dal representant de nies cau diocesan Rev. official episcopal Luregn Vincenz. Sco madretscha assisteva la consorta digl emprem redactur digl Ischi, nies nunemblideivel Casper Decurtins, e sco padrin il redactur actual. Il president Gion Battista Berther ha cun in quort mo vigurus discuors demussau alla fuola, co nies ideal nazional mondi maun en maun cun nies ideal religios.

La redunonza de tractandas ha naturalmein en talas circumstanzias stoviu esser pli quorta. Nus menzionein solettamein: L'elecziun dils delegai della Romania tier la redunonza della Ligia romontscha dils 26 de Sett. a Cuera; il conclus de conceder 300 fr. ord cassa en favur della bandiera della Romania; e l'elecziun dil comite,

che ha resultau: Raimund Vieli, filol., Razen, pres., G. Ant. Schmid, teol., Mustér, vicepres., Ludv. Cabernard, med., Dardin, actuar, revm. Sur can. R. Caminada e scol. Giusep Willi, Lonsch.

1921.

Il comite per 1921/22 ei sin la redunonza dils 4 de Sett. 1921 a Trun vegnius componius ord ils sgrs.: Lic. iur. Gion Darms, Falera, pres.; stud. fil. Giusep Pally, Mustér-Disla, vicepres.; Sur G. A. Schmid, Mustér-Caverdiras, actuar; Sur coplon Calixt Simeon, Sedrun e Dr. Chr.

Sur caplon Calixt Simeon, Sedrun e Dr. Chr. Huonder, Mustér. Igl ulteriur rapport sur questa redunonza suonda en la proxima annada.

Rapport della cassa per 1919—21.

Entradas.

1. Regals per la bandiera	505.— fr.
2. Contribuziun della L. R.	1875.— fr.
3. Per annadas veglias digl Ischi	8.50 fr.
Total	2388.50 fr.

Expensas.

1. Per la bandiera	950.— fr.
2. Inserats, honorars etc.	81.55 fr.
Total	1031.55 fr.

La facultat munta dapresent sin 1945.10 fr. Da quels vegnan ils 1875 fr. obteni dalla Ligia Romontscha impundi vid l'emprema annada dil „Tschespet", la quala vegn a comparer en quort.

Il cassier:

Gion Batt. Simonet, scol., Mustér.